

## Philemon

# Saint Paul, Dinjii Philemon ts'a' Ch'adaqantl'oo

---

### Paul Khadigiinjii ts'a' Mahsi' Nyaa

<sup>1-2</sup>Philemon, jii dehtly'aa nats'a' dihtl'oo. Christ Jesus veenjit gwitr'it t'agwah'in geh'an, zheegwaazhraji dhiidii.

Diichaa, Timothy oozhii, chan nats'a' ch'ee't'igwiniindhan niin'aji. Nant'ee dihaa Christ veenjit gwitr'it t'agwah'in t'oonchy'aa. Nijin nizheh gwizhit tr'igiinkhii gwahahtsyaa ji' diijuu Apphia ts'a' Jesus Christ viniveet'ah'in nilii Archippus oozhii goots'a' ch'ee't'igwiniindhan nariin'aji diineenjit goovaagwandak. Jesus k'injiighit naji datthak chan ch'ee't'igwiniindhan diineenjit goots'a' niin'aji.

<sup>3</sup>Vit'eegwijyahchy'aa Diiti' ts'a' Diik'eegwaadhat Jesus Christ vats'a' khadigihjii, nakhweenjit ch'eegoonzhrii ts'a' tsinehdan nats'an ooli'.

### Philemon, Jesus K'injijii Najii Eenjit Ch'ee't'igwiniindhan Di'iji

<sup>4</sup>Shachaa gwik'injigwiighit zhit Philemon, khit ts'a' khadigihjii daji' neenjit Vit'eegwijyahchy'aa mahsi' vaihnyaa. <sup>5</sup>Vit'eegwijyahchy'aa vigii najii eenjit ch'ee't'igwiniindhan ni'iji ts'a' K'eegwaadhat Jesus chan vit'injyahchy'aa narahnyaa neegwiitth'ak geh'an. <sup>6</sup>Nigwik'injigwiighit eh'an ch'eiinzhrii. Ts'a' aji nich'eegqonzhrii haa gwitr'it t'agwah'in, gwik'iighai' jidii gwinzii Christ veenjit t'igwii'in datthak gaanahandaii

geenjit, neenjit khadigijii. <sup>7</sup>Shachaa, nich'eet'igwiniindhan ts'an shant'ee zhuut'iichy'aa shats'a' nilii ts'a' ɣyaa shashroonchy'aa gaiiyiidhałtsaąi, aąi nich'eegoozhrrii, Vit'eegwijyahchy'aa vigii naąi drii zhit gwinzii neegwahts'ik geh'an.

### Paul, Onesimus Eenjit Philemon ts'a' Ginkhii

<sup>8</sup>Aąi geh'an sheenjit k'eegwiichy'aa t'ini'yaa geenjit noalkat t'ihnyaą. Khan Christ voozhri' zhit gwik'it t'ini'in nakhaihyaa, jyahts'a' gwinzii t'ini'yaa geh'an. <sup>9</sup>Nijyaa Paul ihłi ts'a' nihleenjit ch'eet'igwiniindhan tr'iiłi geh'an gwizhr̄ih, sheenjit k'eegwiichy'aa t'anoonya' nihthan. Niighyuk K'eegwaadhat vitsyaa ihłi ts'a' tth'aii hee veenjit gwitr'it t'agwah'a'yaa, aąi geh'an zheegwaazhraąi neesharąhchii. <sup>10</sup>Googaa dinjii Onesimus vats'a' ch'eegoonzhrii niłi. Zheegwaazhraąi dhidii gwiizhik Gwandak Nizii eech'oaaktan geh'an K'eegwaadhat k'injiindhat dhidlit ts'a' shigii k'it t'inchy'aa. <sup>11</sup>Ch'adał' ɣyaa duuyeh nits'inyaą, gaa juk khan nan shii haa diits'iheenjyaa.

<sup>12</sup>Juk it'ee Onesimus nats'a' neeheedyaa geenjit vats'a' giikhke'. ɣyaa vak'at'ihihchy'aa. <sup>13</sup>Dzaa ch'iitsii tɣy'ah haa dashoochaa gwiizhit Gwandak Nizii eegwaldak shaa dhidii ji' ɣyaa gwint'oo shits'iheenjyaa. <sup>14</sup>Gwik'it t'ini'in gitr'in'ee gwiizhik jyaa naihnyaą ji' gitr'ih'ee. Gwik'it t'iindhan ji' gwizhr̄ih shits'iinyaą.

<sup>15</sup>Jyahts'a' gininjich'ahthat ch'ihlee gwizhr̄ih Onesimus naa iindi', gaa juk gwats'an khit naa heedyaa. <sup>16</sup>Juk slave nilii kwaa, nihk'it Christ k'injiindhat geh'an. ɣyaa gwint'oo vit'eehaałchy'aa, gaa nan aąi shandaa gwitr'it nizii eenjit vit'eehaałchy'aa.

<sup>17</sup>Nihłaa K'eegwaadhat eenjit tr'agwarah'in izhik geenjit ch'eet'igwiniindhan haa adats'a' nihdanaąhchii. Shii nats'a' tr'ineeshizhii deeshihinlyaa gwik'it. <sup>18-19</sup>Nats'a' gwiizuu tr'agwah'ya', datthak gwidihint'oo ts'a' nineegoohikkwat. K'eegwaadhat k'injiindhat dał' nits'iinya', aąi gineenahałdaii gwat'aałchy'aa kwaa. <sup>20</sup>Shachaa, nihłaa K'eegwaadhat k'injiriighit ts'a' veenjit gwitr'it t'agwarah'in, izhik geh'an sheenjit k'eegwiichy'aa t'inizhik ji' shoo shahałtsyaa.

<sup>21</sup>Jidii geenjit jii dehtɣy'aa nats'a' diht'oo aąi gwik'it t'ini'yaa, ts'a' gwandaa chan gwik'it t'ini'yaa gaashandaii. <sup>22</sup>K'eegwiichy'aa ch'ihłak sheenjit t'anoo'ya' yiihthan. Nits'eeheedyaa eenjit gwihihchy'aa sheenjit shrigwinlii ts'a' khadigiinjii, nik'eegwahałthat vaashandaii.

**Jii Dęhtly'aa T'ee Ndaanaa'ałi'**

23-24 Dzaa zheegwaazhrałi gwizhit, dinjii, Epaphras oozhii, shaa dhidii. Nidiveegoozų' nahnyaą. Mark, Aristarchus, Demas, Luke nałi t'ee shaa geenjit gwitr'it t'agwagwah'in nidiveegoozų' nagoonyaą.

25 K'eegwaadhat Jesus Christ vich'eegoonzhrii nakhwaa gooli'.